

職方典第九百三十七卷

杭州府部彙考三

杭州府山川考二

府縣志合載

海鹽縣

花山在縣治東五十里高十五丈周一里坦夷盤礴如岡如陀山多白鵬火鳩亦茂松竹

葛嶺山在花山東三里高四十丈周廻四里山形聳特

箬帽山去葛嶺山東一里高五丈

周半里

石墩山在縣東五十里按縣志高十丈周二里海上要地立巡檢司土城周四十

丈營舍俱備舊戍百人今止巡卒五人虛而不守

小尖山在石墩山東一里高五十五丈

上有烽墩登此西望則石墩僅丘阜耳

黃山在縣東五十二里上有靈泉井按縣志高六

十丈周七里巉巖峭拔其植多楊梅山茶許太守令典治東西兩垞爲名流觴詠處

菩提

山在黃山東半里按縣志高六十丈周七里山頂有靈泉其麓真如寺卽千寶故居旁有張無

垢讀書臺最上爲般若臺無垢同刁令文叔所遊也山多桂竹鳥有鶻鵲文雉

靈泉山在

菩提山東里許

黃陀山在縣東五十里高一丈周二里

橫山在黃陀山南二里硤石

山之北高六十五丈周八里

大尖山在橫山之南按縣志高九十九丈周十里去縣東六

十四里北距智河嶺山有白鵬文雉山峯聳崛起亞於金牛南臨大海上有高峯周一里最爲險要建烽墩臺於上

錢山在縣東六十里高十二丈周半里舊多產水仙今所植多翠

竹蒼松鳥有鷓鴣山雀

白鶴山在錢山南二里高十二丈周半里

管山在白鶴山之

西不一里高四丈周半里

妙果山在縣東六十里高二十丈周七里其尾則袁花山山因

鑿斷判於妙果又名龍尾東去四里爲夾山

龍尾山卽妙果山之尾因鑿斷名龍尾本名

袁花

夾山在妙果山東四里按縣志高三十五丈南北較之西長一里半嘉興志山居金

牛金粟之間故名夾山卉有菊植有桃竹松檜禽多文雉鵲獸有兔狸

贊山在縣東北

六十里高五丈周二里深潭奧渫俗稱錢王磨劍之地

審山在贊山東北一里按縣志高

三十五丈周七里里人呼爲東山貝瓊曰北齊海鹽令周顒至此謂其林境清麗亞於鍾山山之北云北亞山徐秦志硤石鎮西有紫薇東有沈山夾水並峙故名硤石舊圖經云宋臨海南

陽二郡太守沈景葬於此故名沈山杭郡志以審食其墓名審山非也上有崇惠庵基土皆五色有智標塔秦王磨劍石靈池水旱不盈涸

紫微山在審山之西里許按縣志高三十丈

周一里與東山對峙市河貫其中故名硤石山有紫微洞深丈餘廣四尺馬自然煉丹處丹井在山麓名紫微泉宋圖經云唐中書省紫微舍人劉禹錫爲刺史嘗登此山望硤石湖因名曰紫微山邑志云白樂天嘗遊此故名卽硤石山也

硤石山卽紫微山上有寺唐顧況詩家

在雙峯蘭若邊蓋此山脚連東峯有磨劍池

蟹山在縣東六十三里高五丈周半里青陽

山在縣東六十五里高十九丈周三里

黃灣山在青陽山西一里高八十九丈周九里山

形隆崇特峙林木鬱蒼按縣志舊名盈山立寨

金牛山在縣治東八十三里崔嵬濺業冠

境內諸山高三百丈周廻十九里實字記昔吳楚間有金牛自毗陵奔此而沒因以爲名山側有洞深不可測宋建炎初避亂者多居之稍北爲廟山廟山之西二里爲鳳凰山東去二里爲崧山崧山之東又二里爲望夫山自廟山以下諸山無奇花異植惟金牛蒼翠青蔚多雉兔獐獾按縣志昔村民阜伯通見有牛糞金因與弟隨之牛穴此山而入

鳳凰山按縣志高三

十二丈周五里去金牛山西二里有烽堠山寨山形如翠鳳之展翅故名 崧山按縣志

高三丈周三里金牛山東二里 望夫山按縣志卽廟山脚高七十五丈周四里在崧山東

一里山形峭拔立烽堠其上山巔有石盤盤側立石常棠澈水志昔日海商失期不返其妻登

盤望夫泣隕化而爲石因名 廟山按縣志高九十七丈周九里山形深窅迴曲去縣六十

八里金牛山北京抵海鹽縣界西爲鳳凰山下有烽堠上有蘇臯將軍廟宋勅賜曰靈祐

談家山在縣東南七十里按縣志名譚山高二十丈周三里五代南唐譚峭鍊藥得道處所著

化書傳于世觀仙鑑所載詩亦其寄迹海嶠之證澈水志云在永安湖西紫雲山之南有高嶺

入海鹽縣界 烏龍山在譚家山東二里壁立昂起若翱若翔上有烏龍井按縣志舊名烏

山高六十丈周二里在譚山北二里唐天寶五載置烏龍戍宋時廢下有烏龍井大旱不竭水

清可鑑祈禱輒應宋朝勅賜崇祐廟金昌引教諭題其廟云呼龍旋作雨禱并忽聞雷 石

碁山在縣東北六十五里高四十五丈周四里巖阻岑蔚上有樵泉冬夏不涸 葛嶽山在

縣西南四十三里 盤山在葛嶽山東一里高七丈周二里 赭山在盤山南八里按縣

志高七十五丈周三里二百步西南界仁和與紹興龜山南北相峙是爲江海門戶海潮至此與江流值束不得溢益激怒作勢曹漢炎赭山詩江流曲似陽冰篆山色丹如葛令砂 禪

機山在赭山西不一里按縣志高五丈周五里一百步嶺有禪師井 文堂山在赭山之東

僅半里許葛巖以下諸山皆瀕海按縣志明永樂初以沿海扼要徙赭山巡檢司於上 雷

山在縣西南四十三里奔潮盪激漸徙入海按縣志高七丈周一里 巖門山在縣西南四

十七里高九十丈周五里穹窿峭拔疊障蟠礴號爲主山東十里則蜀山西一里則河莊山河

莊東不一里爲胡家山按縣志巖門山上有塔宋時設鹽場山無佳植獸有獐獾鳥則文雉鴉

雀 河莊山按縣志高七丈周八里在巖門山西一里 胡家山在河莊東不一里按縣

志舊名黃山又稱越山高五十丈周六里二百步圖經曰黃山一名越城山其土色黃縣西四

十里有百尺浦越王起百尺樓望海疑卽其處故越城所自名耶 蜀山在巖門之東十里

按縣志高五丈周二里在巖門東十里去縣治二十七里隋書鹽官縣蜀山山有洞宋紹興癸

丑慈元禪師結庵後廢 茗山在縣治西北三十八里按縣志俗名隱山高八丈周二里六

十步植茂松竹鳥有山雞雉雉沈繼先詩九曲溪南訪茗山茗山高臥水雲間是其處也

赤土嶺在縣治東六十里長一里二百步東南接靈泉井西連黃山脚按縣志名赤兔金

牛洞在金牛山側 蜀山洞在蜀山之上 紫薇山洞在紫薇山後深一丈一尺闊四尺

馬自然鍊丹之所世稱爲神僊洞 秦王磨劍石詳見古蹟 望夫石在廟山之上

怪石在真如禪院 箭石在徐王土穀神祠出土二尺周圍二尺俗名錢王箭 盤陀石

在硤石紫薇山後神仙洞之左

海在縣治南十里西接浙江潮汐往來崩漲不一捍築之功最難按陳善海塘考海鹽縣治南
瀕海海之上卽塘塘之距城百武而近東抵海鹽西抵浙江相距延袤百里塘西南數十里有
赭山其南有龜山相對峙夾爲海門潮自海趨江從茲入焉始由廣衍進入隘口橫流至此東
不得肆輒怒而東返東五十里有山名石墩與赭山相望而峙若兩拳然潮東返爲此山所障
復怒而西東西蕩擊數十里間一再往來狂瀾駕風若萬馬馳驟卽金石爲塘不能保其終古
不敝矧木石蘆灰安所恃以能久耶舊志塘外有沙場二十餘里沙場內有陸地草蕩桑柘聚

圍一百六十七頃有奇夫塘外有護則海潮不至衝嚙石堤內固可以經久今沙塲草蕩悉淪入海直以數尺之塘力抗巨浸之瀾天脫更內蝕窻其危哉宋元以前海塘廢興遼莫能紀逮洪武以至萬曆海凡五變塘五修永樂九年海決民流移田湮沒朝廷遣保定侯孟瑛等盡役蘇湖九郡之夫貲累巨萬積十三年堤成其患始息嗣後成化甲午弘治壬子嘉靖戊子迄萬曆乙亥海或溢或決塘隨築隨圯雖勞費不至如永樂之甚然公私困於茲役亦屢矣夫塘決海昌患在一邑耳往時顧役及外郡者何哉亦以地脈相因其利害之所關大也蓋海窻於吳爲陲於越爲首地形最高故境內麻涇洛塘長水塘諸水皆北流一從東北由淞泖趨滬瀆入海一從正北過吳江趨白茅入江俗因指吳江塔巔與長安壩址相竝則海窻之地高於他郡邑明甚故海窻之每次決注彼諸處如建瓴然則障海昌者亦所以障列郡也塘之修廢其有關於東南利害甚切而當事者往往失於後時及工役旣興則又計工惜財苟且完事是以此塘未成而彼堤又決萬曆五年春巡撫徐公拭顧瞻海塘傾圯廢缺大駭曰失今不修他日盡壞矣將聽民之爲魚乎因與巡視水利陳詵翕謀修築而以其役委縣尹薛湖五閱月而塘

成波濤汨沒之區今已起昏墊登衽席矣顧余觀海鹽之塘與海鹽異鹽塘有大患亦有大利
鹽塘似無顯患而實有隱憂蓋鹽塘陂池相屬有內河可開故潮勢至此既爲分殺而引其流
更能使草場悉爲膏腴是大患弭而大利興也若鹽塘逼近城郭無內河可開幸潮水緩於鹽
耳設一旦海嘯直蕩邑治其爲隱憂可勝道乎聞鹽邑額設捍海塘夫二百名每歲編派役銀
四百兩爲令長者誠能加意海防每遇潮汐之月遣官就塘察視一有崩圯審取良民佐以能
吏卽時領銀修治毋令後時此亦未雨綢繆之計也萬一天祐鹽民塘十年無患則銀之積益
富卽興大役亦不必派及平民矣至於築塘之法余竊有取於海鹽乙亥之決海鹽爲甚其修
築也慮湍激爲害有盪浪木椿以砥之慮直蕩堤岸有斜堦以順之其累石下則五縱五橫上
則一縱二橫石齒鉤連若絙貫然卽百計撼之不搖也修鹽塘者誠一準海鹽新塘之式則是
一勞永逸之計耳安得實心任事之人而與之計海塘哉

高湖去縣東北十七里東西二

十八里南北一里三步

谷湖去縣東北十七里按縣志在縣東北四十六里周四里深五

尺勝八十斛舟漚田百頃

月湖去縣西南四十五里赭山西側周圍一百八十丈其形如

月故名深五尺海潮崩潰沙塗壅塞

建興湖去縣西北二十五里吳建興中開因名按縣

志東西十里南北六里深五尺舊志誤作建亭

硤石南湖去縣東北六十里闊三十六丈

源自茶湖南通麻涇港迤西南流入洛塘河東達海鹽縣界黃道湖按縣志天目分流正出其

中卽谷水也唐中書舍人白樂天嘗登硤山望硤石湖卽此舊名上谷湖後名硤川徐泰海鹽

志曰鷓鴣湖長湖上谷湖俱西受硤川之流湖水南分經市中卽名市湖北注長水

茶湖

去縣東北六十里周三里源自吳姚塘河南流入硤石南湖

竹浦湖去縣東六十里周六

里深五尺

彭墩湖去縣東北七十里其源自石碁港迤西南流入硤石南湖按縣志其水

俱東北流至白茆港入海

縣市河在縣城內其源首自西湖北通二十五里塘自城北拱

辰水門入東南經勝安橋過安肅水門會淡塘河

淡塘河去縣西北二百步宋嘉定間海

岸崩陷築堤以障潮水自市西至秧田廟約長六七里按舊志其派自錢源來今河尙存東抵

縣城壕西則壅塞北通運塘河

郭店塘河去縣北二里其派自新塘河抵縣城壕自泮江

塘河而南曰止溪溪南曰胭脂涇相傳范蠡載西子泛舟處

新江塘湖去縣東北二十里

此靈邑下塘水也源自德清縣大麻溪之支派由本縣莊婆堰西北東流抵縣城壕逶迤七十餘里支港甚多東北入嘉興境其東南流由渾水石橋注入袁花塘縣志作辛江塘河 二

十五里塘河自縣市河北出拱辰水門過西南二十五里會於運河而達長安壩按縣志舊名湖塘以通湖水也水源自西湖來達於運河自臨平至長安壩過東二十五里宋陳恕浚河築塘加廣一尺民甚利之號甘棠堤 洛塘河在縣西北三十里乃新江塘河支流東入硤石

南湖旁有港通小河迤北入嘉興界長水塘河

袁花塘河去縣東五十理源自吳姚塘港

長六十里許支港不一南通白禪港西流入縣城壕按縣志云考吳姚塘港東北注黃道湖白彈港注入嘉興境舊志言西流誤也許令典曰袁花之名不知所始己未七月余西垞東池涸溶之二尺許有甌上鐫唐故戚氏沈夫人墓志銘文簡朴可百字大中六年葬於鹽官縣靈泉里金牛鄉去袁花市南三里之原此時鹽官尚稱縣不稱州州名在唐後也而袁花之爲市自唐宣宗以來有之 峽石鎮市河去縣東北六十里乃洛塘河支流東入嘉興縣長水塘河

南北舟航大道

放生池在縣北一里舊在延恩院東南二百五步宋慶元四年改鑿於此

白洋池在縣西北二十五里周廻五十五丈八尺發源新丘塘

靈龜池在縣東北六十里

峽石鎮靈龜寺內宋時廢惟池尙存按通志名靈池

夾山港去縣東六十里北流入彭墩

湖與下吳姚石棋秋門三港皆袁花塘河支派

吳姚塘港去縣東六十五里袁花塘河之

支派東北入海鹽縣界黃道湖

石棋港去縣東七十里袁花塘河之支派長十里許北通

彭墩湖東入海鹽境源出石棋山下

秋門涇港去縣東北五十二里北入茶湖袁花塘河

之支派

麻涇港去縣東北五十八里乃新江塘河支派北入硤石南湖按縣志縣東北四

十八里

赭山港去縣西四十五里上塘運河之支派南抵海塘岸

東陳村港去縣西

北四十七里係新江塘河之支派南抵運塘岸

中間龍潭在長安鎮中間內上有龍王祠

雪峯泉在縣東南五里壽聖院側唐雪峯義存禪師結廬於此手鑿一井大旱不竭井中常聞

風濤之聲元延祐間海圯不存

紫薇泉在硤山鎮紫薇山

靈泉井在縣東六十里黃

灣真如寺傍昔有操法師夜與神講佛法一日井涸神告之曰當有泉發於山竇已而果然謂

之靈泉

市邑十井相傳阮店村章仁蘊所開今仁賢坊雙廟巷安國寺巷三井皆是也其

在仁賢者以白石爲欄上有刻云當邑章仁蘊開此義井第十四口元豐壬戌歲記以此觀之則舊志所載市邑十井又不止是數矣餘井皆不復可攷矣 異井一在安國寺深十三丈

本境土薄凡浚井未三丈而泉出故不能深獨此井深大旱賴以取汲一在延恩寺深七尺一在尉廨舍內味甚甘石欄上有至和元年刻字邑中第二水也尉趙師羽立亭於上曰送雲又丞廨東一井其水在尉廨井下 烏龍井在縣東七十里冬夏不竭相傳臯蘇將軍黑馬跑

於此地得泉遂名後果有龍或時現爪宋邑令胡堅常陳恕元州判申維賢皆以旱禱獲應

禪師井在縣西南四十五里禪機山 義井一在儒學儀門一在縣西五里邑人徐仲所鑿

一在阮塾灣張泰鑿井上有亭邑令許題曰惠津一在孫家橋邑人孫氏鑿 石井在縣西

北一十二里世傳馬自然常入此井有祠在塘畔年久塌毀弘治四年邑人梁詰修祠鑿井

新塘卽備塘在縣東自天妃廟東抵黃山長五十里 六十里塘在縣東至黃灣長六十里

范蠡塘去縣西二十五里 運塘在莊婆堰北崇德縣界牌起至許村西至仁和縣界三十

餘里 湖塘在縣西北一百五十步谷昌鄉古塘行路

富陽縣

觀山在縣治東百餘步又名鶴山一峯高聳橫截大江富春志云孫氏嘗於山頂建道觀因名
又號石頭山有亭曰勝覽按縣志縣東之水口蕩滉無際以此山襟抱懷合邑賴以立地舊屬
居民病於樵蘇會真覺僧買得之宋縣令曾治鳳出公帑錢六萬易而屬之官稠木傍生綠篁
茂鬱凌空交合疊翠堆青一邑形勝頓爲改觀山祠巖先生淳祐間縣令李迪更創舊有石牌
上鐫釣臺真蹟四字今亡下有四亭曰逸雲曰耕春曰澄江曰虛泉下又立小庵置僧以供洒
掃東有觀亭嘉定中縣令程珙建山頂舊爲儒學後改吉祥寺久廢洪武初因其故址建山川
壇未幾改文昌祠後爲雙明閣改傳心堂堂爲四賢祠東南爲鐘樓又東爲待月橋堂西南爲
管公祠前爲石岩下有石洞內有泉岩前爲玉虛殿東爲藥師堂觀音閣西爲關壯繆祠再西
爲靈官祠山舊有大鐘聲音清越聞數十里八景中所云吉祥曉鐘其一也其鐘本嘉靖中僧
人方某自永安山妙智寺移來後爲方國安所毀相傳鐘以白金雜赤銅爲治國安利其資故
燬之 吳鼻山在縣東五里俗名大嶺山勢稍峻下瞰大江路狹而險行者患之宋乾道中

縣令程楠因邑士謝安頤請鑿石欄護之人以爲便嘉定癸酉令程瑛修丙子令曾治鳳增立石柱百有七十翼以欄楯寶慶乙酉令趙汝捍易石欄爲石壁仍置庵守之名曰惠民淳祐戊申令陳夢炎因旱禱雨立麻源真君祠於山嶺按縣志爲惠民延壽寺今不存萬曆四十年張一鶚重修嶺路嶺上建石亭俾行者稍得憩息久之亭圯路敝仄今重建新亭命工鑿平徑道如坦途而體勢之奇不改

赤松子山在縣東九里高一百五十丈周迴四十里一百步赤松子駕鶴時憩此山形孤圓望之如華蓋又名華蓋山一名赤亭山太平實宇記嚴光釣於赤亭一名鷄籠山 梭山在縣東二十里高二十丈周迴二里中隆外驪望之若梭故名

都輿山在縣西南四十里儀鳳村高九十丈廣三十五里昂首奔蹄有馱驪騰伏之態以其狀類馬又名馬山 靈岩山一名南山在縣西三十里高一百八十丈峯巒秀麗岩壑幽奇林

木蕭森乃在霞氣之表山下有池名曰龍潭有仁惠龍王廟按通志先有僧曇超居杭之靈苑山有龍化爲老人詣曇超曰吾龍也昆弟五人吾處其長邇者鄉民耕山逼我居室羣龍怒閉膏雨以害稼吾不忍民之苦聞師道行必能化伏諸弟師允其請未卽往龍感夢於官民迎師

至觀山結壇戒衆浮舟誦經雨大霑足羣龍復請師居湖南山岩山峻不能陟龍化白馬載師以登至今石上馬跡尙存岩下有池歲旱禱之則雨賜號靈悟大師而龍以仁惠爲額 貝

山在惠愛村去縣西三十里西屬新城界山頂有湖泉源不竭及蕭使君廟新城旱則禱雨於此 紫薇山在縣西五十里山崛起東浸大江中世傳吳紫薇黃門侍郎孫瑤葬此因名

陽平山在縣南十五里後漢孫鍾種瓜其上有異兆鍾卒子堅因葬鍾于此常有紫雲蔓延數十里人謂孫氏當興後果應 天鐘山在縣南十五里太平村巨石軒舉欲墜未墜形態萬

狀石泉奔流噴瀉懸崖濕有數道若匹練然飛雪濺沫響若輶雷中有潭清澈見底峭石環立上有天鐘庵稱小天竺 亭山在縣南十八里慶善村高二百餘丈晉處士孫文度建亭于

頂因名山頂有石穴清泉瀉下百丈至左肩流注一灣名龍門灣峯巒迴合水分數派懸流飛瀑泉石奇勝岩壑悠然 龍門山在縣南四十里山勢壁立有泉自山頂懸石崖作瀑布飛

漱噴濺非遇暑炎冬涸殆不可近山腹有上中下三潭天然石泓名曰龍潭其中下二潭蹤跡可至上潭邈然無津可逮間有遇者去而復來不可卽矣 永安山在縣南五十里小剡村

山甚高大石路數里至平處有妙智寺羣山迴繞內有田六十畝溪水環流有橋曰聖安因以名溪水分兩處瀉下前有方池古木森蔚

小隱山在縣北一里三十步縣治主山也一統志云爲縣治鎮山卽此故不甚峻且奧而地脈隱隆孕奇胎秀青厓翠發遙同黛抹云

樟

岩山在縣北五里高出衆峯岩有大樟故名又曰橫山岩背爲舒姑坪南爲獅子岩岩石奇峭四顧皆虛壁立峻絕蔚蔚蒙蒙雲氣若出其下世傳赤松子鍊丹之所石岩中有龍西北穴中久晴起霧乃雨候也

白龍山在縣北二十里地屬開化村山勢如屏與姥岑相連旁有小

沼故老云嘗有白蛇往來樵者見蛇吐珠捕而烹之舉家皆斃珠歸里人楊氏有羽衣至其家語及珠求見而懷之人忽不見故以爲名

姥岑山在縣北二十五里白昇村一名天姥峯

右石岩覆空如大厦上有沼赤萍生其中映水如濯錦下有廟爲姥岑廟歲旱禱之則雨

西巖山在縣北三十里岩下洞口有沼與江湖應

靈峯山在縣東南四十里高出衆峯絕

頂平衍有田數畝源泉不竭世傳昔有宣氏兄弟三人耕山得泗州石佛結庵奉之至今尙存歲旱禱雨卽應因號靈峯

剡望山在縣東南五十里其山如仙人坐狀從剡溪入峯巒迴